

Nagorodo

Imesimuliwa na Fulani

Digodigo, 2005

Kwa ghairye kimwe, mugharisya akasireragwa mbaana. Akatemaga weka, akatemaga weka, laabu gwasera akola mbyo mugonda jurare ajujoka, ajujokaga, ale ajuraga. Laabu lee, nabatuubwa mwenihe oyyo Nagorodo. Nabamubeela lee, “Haaba ejooke ejuraga, tughagharage milo ho.” Akaghagharaga milo ho mugonda egolo ebele anga edatu. Aja abeela mulome lee, “nolela milo ng’ine.” Akanolelwa milo eena akimihira moi, akadaghara.

Laabu abooka akageera gutune lee, agakola mugonda mbuleme. Ayyo ngo atyanti ehakela mwenihe akamuntya, akamuntya, linge agitela bwesya gikobota. Hinja ebogatyee moi lee, akola nasererwe akola benihe mbagitire bo mbamuserere baana beene babyo ba biryooka.

Bakasejaga, bakasejaga, akaghaerigagwa byo mugharisya akang’ore eragana. Laabu mulakolo oyyo amukwejaga akaboorya hivi, “Sye, mugharisya oyo nabarisika obyo lee, halafu ahakaga birano bineni ahakelaga ou?”

Mulakolo olya akabengela busele akalala akeebisa abane nji, abane olya aragerigagwa. Mugharisya oyyo sei ati nji, ati mwana. Akalala busele akeebisa, gukajwa mbaanabaka babogate gaasi ya ng’ina. Baditoragya mulyangu, bakatorotorya mihendo bakasyaala bakalagela bakasuba. Basuba esya lee, akabooka akang’ore ebugya *naabu!* Akadaba mwenihe.

Akabuga, “Baba haabe endaba obyo nwa mbolaga! Woi! Haabe endaba obyo nti eguha nwambolaga!” Basi akamudaba, amudaba lee, akamuntia nene mugharisya olya akang’ore eja. Aja lee, akamukola akajuura, akajuura, akabuga, “Woi, nobandela nyaanyi yya ntibaje sina.” Basi Nagorodo olya sye nkinto murengerenge najooke ehikya nji? Akamuntya ayyo akaba Nagorodo hati kilya akehikya ati maguha.

Basi kwajwa mbalugu beehē ba biryooka baja emughujaga, baja emughujaga, baja emughujaga. Laabu lee batemi, nkubaja kimugungu, nkubaja kimugungu kineni, nkibamukola wɔɔɔ kaane *puu!* Nkibamuhira namagolo. Nabahirwa nkimugungu kilya. Basi, nabahirwa mbalugu beehē babiryooka. Ndibadung'a hɔ gutyanti jɔɔke ehumwa mbiryooka gugharigwe monto. Na gukakɔlwa Nagorodo lee, monto alwaala lee, ae ebeela bantu balya barwarye mwana. Gukakɔlwa sye, Nagorodo nahumia binto byɔɔnse ndyɔ akajelwa nkimugungu. Ajaga eborigwa gitemi gukabugwa gokyo gwanse lee. Sye, Nagorodo nahumia bibugu byɔɔnse ndyɔ akajelwa nkimugungu akageera. Basi, ekagera ayyo.